

kāh-kwēski-wēpan

nicāpān, nōsisimis

ēwak ūma piko mēkwāc nika-kī-mēkin
kā-kakwātakācihot
kikāwīnaw askiy.

pē-kiskēyihtamwak kitayisiyinīminawak
ē-pīkiskwēmakaniyik askiy.
ayiwākēyihtākwan ta-nitohtamahk.

miy cistēmāwa
mistasiniy.
asinīhk akwastā
kihtawakay,
kicihciy mīna.
nitohtaw.
kika-wīhtamākonaw
kā-isi-itēyimāyahk
ēkā kā-wāpit.
māka
tāpiskōc nipīw-āya,
sāpwāpahkēw
pasakwāpiwinānihk
tāpiskōc ākowēyēkin.
asinīsisa kā-māwasakonācik awāsisak
pāh-pāhpisiyyiwa otasiwacikanisiwāhk.
kiskisi! pēyakwāw ūma
kiya.

mēki cistēmāw.
papitikosini asicāyihk
ita kā-mistāskosit
mītos.
nitohtaw. kika-wīhtamākonaw
kā-isi-yēhyēt kiyānaw ohci.
tānisi omaskihkīma
kikāh-kī-miyo-ayāhikon kōhpanihk.
kika-wāpahtahik
itē kā-kī-nihtāwikiyan,
otisiyāpiya kā-mihcētiki

nīhcikinwa atāmaskamikohk.
okihc-āniskōcāpānisa
kāh-kakwē-otihtamiyiwa opawātamowiniyiwa.
kistikētān.

miy cistēmāwa
iskotēw. mōsihtā kīsōsiwin.
kanawāpahta ē-nīmihitōmakahk. kiskēyihta
anim ānima kā-kī-saskitēk
ispīhk kā-nihtāwakiyan.
ēwakw ānima kā-mōsihtamōhikoyan
kisākihiwēwin, kicīhkēyihtamowin, kikisiwāsiwin.
kisīhkiskākon
ka-manācihtāyan.
kisa-sīhkiskākon kipawātamowinihk isi.
ēwakw ānima
kā-pīkiskwēmakahk
kiskīsikohk.

miy cistēmāwa
nipiy.
ēwako mān ānima kā-kākwē-kāhcitinamahk
kā-mākohkasahk pīsim
kiyēhyēwininaw. kika-wīhtamākon
tānisi ē-kī-isi-nihtāwikipihcikātēk
kwēspay kōhtāwiwiy wiyawihk ohci,
tānisi ē-isiciwahk kā-wanitipiskāyik
ta-sisikwaci-wayawīciwahk
kikāwiwiy okosisimāwihk ohci.
kika-pakosēyihtamākon kimiwanāpōsa
kā-pahkihtiki kīsikohk ohci
ta-twēhōmakahki kitēyinīhk
ē-mēkwā-nīmihitoyan kā-kimiwahk.

miy cistēmāwa
yōtin.
pimwēwēstin, matwēyowēw, kīmwēwēstin.
tahkonikowak kahkiyaw kihc-āniskotāpānak
ē-pētamākoyahk
ēwakw āna ahcahk kā-pimātisit
ē-wīcēwikoyahk.

sakicihcēnikow
askiy, pakitinamōmakan
nipiya, tawīstamōmakan
iskotēw
kā-nihtāwkiyahk.

mēki cistēmāw.
sisiwēpin kistikānihk,
itē askiy
kā-pēhot
ta-atamiskākoyahk
kahkiyaw kiyānaw.

ēwak ōki, nicāpān, nōsisimis,
kōhkominawak,
kimosōminawak, kākikē
māmawi-atoskēwak, sakicihcēnitowak
ta-miyikoyahkok
kipimātisiwininawa.

© Louise B. Halfé – Sky Dancer

Poète officielle du Parlement

Traduction : © Jean Okimāsis et Arok Wolvengrey avec Louise B. Halfé – Sky Dancer